

# Jahresbericht Präsidium amathea.ch 2023/24

*Das Geheimnis des Glücks liegt nicht im Besitz, sondern im Geben. Wer andere glücklich macht, wird glücklich.*

D Vögu zwitscheres vo de Dächer.... es wird Frühlig u automatisch stigt mi Energielevel. I fühle mi glücklecher u freier...bi haut eifach nid so füre Winter gmacht.

Dörfe Glücksmomänte z erläbe u die o z erchenne, bringt üsi Ouge zum Lüchte u zouberet üs es Lächle uf z Gsicht u dermit hoffentlech o üsem Gägenüber. I bi scho mau glücklech, dass i die HV wieder ohni Gips u angere Blessure darf begleite, o we gloub die einte oder andere Rückständ no sichtbar u merkbar si. Oder isch mini Vergässlechkeit doch em Alter zuezschrife?

Mir chöi z Glück nid feschthalte, dr Glücksmomänt cha sech aber als schöni Erinnerung feschtsetze u üs über schwieregi Zyte hinweg häufe.

Begeisterig cha e Schlüssu zum Glück si. Begeisterig isch asteckend und es macht mi immer wieder glücklech z gseh, mit wieviu Begeisterig are Produktion «gschaffet» wird. Theater u Gsang isch e Lideschaft u aui Theatermönsche hoffe, dass sie mit ihrer Präsentation, ihrne Kreatione ds Publikum chöi glücklech mache.

A dere Steu möchte i mi gärn einisch meh bi öich aune für öie Isatz u öies Härzbluet zu Gunschte vor Kultur bedanke!

I üsem Vereinsjahr hani, näbscht no chli Arbeit, etlechi settegi Glücksmomänte dürfe erläbe ... guet ... Arbeit cha ja o glücklech mache!

Am Volkstheaterfestival Meiringe dörfe mir immer es paar Tag Theaterluft schnuppere, sech mit Glichsinnte unterhaute, tolli Theaterproduktione bestuune, u bis spät id Nacht ds Zämesy gniesse.

**Zum Glück** cha z Festival o im Jahr 2024 düregführt wärde.

I däm Zämehang isch üses Vereinsjahr o ganz im Zeiche vor Organisation vor JV ZSV 2024 in Meiringe gstande. Da hets u gits doch einiges z bespräche, abkläre u o immer wieder Problem u Schwierigkeite z löse.

**Zum Glück** stö üs im OK u im Umfäud viu engagierti Mönsche zur Site. U ... mir fröie üs, öich aui im Land vor Meringue dörfe z begrüesse.

Für d JV ZSV im Mai in Stei hani es Dirndl us dr Jugendzyt vo mire Mueter chönne uslehne u mi Armschiene het mi **zum Glück** nume am Tanze ghinderet.

Spannendi Anekdote wie zum Bispieu ar Podiumsdiskussion a üsem Mitglieralass zum Thema «Biedermann und die Broncos» - Theaterrecht, berichere dr Autag.

**Zum Glück** gits da usbiudeti Fachlüt, wo üs anhand vo amüsante u erstuunleche Bispieu das vilech eher trochene Thema hei chönne necher bringe.

Im Kurswäse si 23 Kürs planet gsi u 12 hei chönne düregführt wärde. Im amathea Gebiet si 4 abotte worde u 1 (Wuchenändkurs «Schreibwerkstatt» mit Paul Steinmann) het **zum Glück** chönne stattfinde.

**Zum Glück** si d GA u ZV Sitzige online, so überchunnt üse Kater sini Strichueinheite, wenn är sechs näbe mir bequem macht. Är begrüessts sehr, dass di Sitzige hüfig lenger duure.

Ir Theaterkommission für ds Theaterfestival Meiringe gits viu spannende Momänte, agfange scho bim ga luege vo de Theaterproduktione u de bir Begägnig mit de Beteiligte. So chani o no chli ir Schwiz umereise. I bi **glücklech**, darf i dert derbi si.

Zämeffasst: I ha **Glück**, dass i bim u im Theater immer wieder nöii Mönsche darf lere kenne u i däm Zämehang uf interessant u spannendi Begägnige mit öich darf zrüg luege. Das giut o für d Vorstandssitzige mit mine Kolleginne u Kollege.

Merci aune viu Mau!

Im Mai 2024

Härzlech

Pia Abplanalp  
Präsidentin amathea.ch

